

# Mempelajari bahasa Arab tuntutan agama

Berita dan Foto : Dk. Vivv Malessa Pg. Ibrahim

**BANDAR SERI BEGAWAN**, Rabu, 1 Februari. - Kepentingan mempelajari bahasa Arab tidak dapat dipertikaikan sejak dulu lagi kerana ia adalah sebahagian dari tuntutan agama kerana adalah susah bagi umat Islam dapat memahami rujukan utama dalam bidang ilmu agama seperti syariah, perundangan, muamalat, ibadat dan sebagainya tanpa merujuk pada kitab-kitab muktabar, yang mana setentunya menggunakan bahasa Arab.

Apa yang lebih signifikan bahasa

Arab juga amat dicintai oleh mereka yang bukan berbangsa Arab hingga lahirnya ulama-ulama yang hebat dalam bidang Bahasa Arab sedangkan mereka bukan daripada kalangan bangsa Arab itu sendiri seperti Sibawaih dalam bidang Nahu, Bukhari dan Muslim dalam bidang Hadis, Al-Zamakhshari dalam bidang Tafsir, Ibnu Khaldun dalam bidang Tamadun dan Peradaban.

Pemangku Menteri Hal Ehwal Ugama, Yang Mulia Dato Paduka Awang Haji Abdul Mokti bin Haji

Mohd. Daud menyatakan perkara tersebut semasa menyampaikan Ucaptama pada Majlis Perasmian Persidangan Antarabangsa Bahasa Arab di Asia Tenggara Tahun 2017 yang berlangsung di Dewan Tarbiyah, Kolej Universiti Perguruan Ugama Seri Begawan (KUPU SB), di sini.

Pemangku Menteri Hal Ehwal Ugama seterusnya menambah, begitu juga dalam kalangan ulama Asia Tenggara seperti Daud Al-Fatani dan Al-Marbawi juga terkenal dengan kefasihan dan kepakaran mereka dalam bahasa Arab.

Pemangku Menteri Hal Ehwal Ugama juga menyentuh, di Negara Brunei Darussalam, persekolahan

Arab telah bermula dari tahun 1941 sehinggalah ia tersekat disebabkan penaklukan Jepun pada tahun 1942.

Jelasnya, dengan kebijaksanaan Al-Marhum Sultan Haji Omar 'Ali Saifuddien, Sekolah Arab dibina semula pada tahun 1964 dengan nama Sekolah Menengah Arab Laki-laki Hassanal Bolkia, yang mana telah banyak melahirkan para ilmuwan dalam pelbagai bidang tidak terkecuali Bahasa Arab.

Pemangku Menteri Hal Ehwal Ugama menjelaskan lagi, pada tahun 2004 Bahasa Arab telah dijadikan sebagai mata pelajaran yang dipelajari di sekolah-sekolah di bawah Kementerian Pendidikan dan seterusnya menjadi pelajaran wajib bagi sekolah-sekolah agama bermula tahun 2011.

Itu jelasnya, menunjukkan keprihatinan kepimpinan Kebawah Duli Yang Maha Mulia dalam menjadikan bahasa Arab sebagai syiar umat Islam di negara ini.

Namun katanya, dengan jumlah penduduk Asia Tenggara seramai 273,300,000 dengan pelbagai bahasa dan loghat yang berbeza, adalah sudah tiba masanya untuk menjadikan bahasa Arab sebagai pilihan bahasa komunikasi dalam kalangan masyarakat Asia Tenggara selain bahasa Inggeris.

Menurut Pemangku Menteri Hal Ehwal Ugama, ia bukanlah perkara yang mudah namun tidak mustahil jika disertai keazaman dan iltizam yang tinggi.

Oleh itu katanya, diharapkan melalui persidangan ini akan mencapai mekanisme yang terbaik dalam membudayakan bahasa Arab sebagai pilihan bahasa komunikasi dalam kalangan masyarakat Asia Tenggara.



**PEMANGKU** Menteri Hal Ehwal Ugama, Yang Mulia Dato Paduka Awang Haji Abdul Mokti bin Haji Mohd. Daud semasa menyampaikan Ucaptama pada Majlis Perasmian Persidangan Antarabangsa Bahasa Arab di Asia Tenggara Tahun 2017.

Terdahulu, Pemangku Menteri Hal Ehwal Ugama menyatakan, tema Persidangan Antarabangsa Bahasa Arab di Asia Tenggara Tahun 2017, 'Al-Arabiyyah : Bahasa dan Tamadun Umat Islam' adalah sangat tepat dan sesuai kerana tidak syak lagi bahasa Arab adalah milik umat Islam sejagat dan bukan hanya bagi bangsa Arab semata.

Ini katanya kerana ibadah yang umat Islam lakukan seperti solat, puasa, haji, membaca Al-Quran dan sebagainya tidak dapat lari dari bahasa Arab.



**ANTARA** yang hadir pada Majlis Perasmian Persidangan Antarabangsa Bahasa Arab di Asia Tenggara Tahun 2017 yang berlangsung di Dewan Tarbiyah, Kolej Universiti Perguruan Ugama Seri Begawan.

## Rangka masa depan bahasa Arab di Asia Tenggara

Berita dan Foto :  
Dk. Vivv Malessa Pg. Ibrahim

**BANDAR SERI BEGAWAN**, Rabu, 1 Februari. - Matlamat utama Persidangan Antarabangsa Bahasa Arab di Asia Tenggara Tahun 2017 adalah untuk mendapatkan seberapa banyak maklumat tentang peluang-peluang pembelajaran bahasa Arab dan keberkesannya yang antara lain termasuk isu-isu semasa serta keperluan ke arah pembangunannya bersandarkan kajian ilmiah sebagai landasan pengukuhan peluang dan keberkesanan pengajaran dan pembelajaran bahasa Arab masa hadapan.

Perasmian persidangan tersebut telah disempurnakan oleh Pemangku Menteri Hal Ehwal Ugama, Yang Mulia Dato Paduka Awang Haji Abdul

Mokti bin Haji Mohd. Daud yang berlangsung di Dewan Tarbiyah, Kolej Universiti Perguruan Ugama Seri Begawan (KUPU SB), di sini.

Sementara itu, Pengarah Pusat Bahasa, KUPU SB, Dr. Awang Haji Hambali bin Haji Jaili, selaku Pengerusi Bersama Jawatankuasa Kerja Persidangan dalam ucapan alu-aluannya antara lain menjelaskan tujuan persidangan tersebut diadakan bagi mewujudkan kolaborasi, hubungan strategik dan jaringan kerjasama profesional di antara para pakar ilmuwan Bahasa Arab khususnya daripada kalangan negara Asia Tenggara agar pengalaman, pengetahuan, kemahiran dan idea positif dapat disebarluaskan serta

dimanfaatkan bersama.

"Semoga ia akan menjadi wadah perkongsian ilmu pengetahuan, kemahiran dan pengalaman demi meningkatkan lagi kecekapan dan keberkesanan pengajaran dan pembelajaran bahasa Arab sebagai bahasa umat Islam sejagat," ujarnya.

Persidangan yang julung kali diadakan itu adalah anjuran bersama Pusat Bahasa, KUPU SB dan Fakulti Bahasa Arab, Universiti Islam Sultan Sharif Ali (UNISSA).

Hari kedua persidangan tersebut akan diadakan pada 2 Februari bertempat di UNISSA.

Sebanyak 40 siri perbincangan akademik dalam bidang pengajaran dan pembelajaran Bahasa Arab akan diadakan yang merangkumi ucpatama, ceramah perdana, sesi perbincangan meja bulat dan 37 pembentangan kertas kerja yang melibatkan 17 pembentang dari luar negara, iaitu dari Arab Saudi, Oman, Sudan, Malaysia, Republik Indonesia dan Negara Brunei Darussalam, sekali gus memberikan peluang bermanfaat bagi semua peserta dalam menimba ilmu yang akan dikongsi melalui persidangan tersebut.

Para peserta yang menyertai persidangan itu terdiri dari pengamal bahasa Arab dari kalangan pengajar dan pelajar bahasa Arab, pensyarah, penyelidik, pegawai-pegawai kerajaan dan swasta dan orang perseorangan.

Persidangan Antarabangsa Bahasa Arab di Asia Tenggara Tahun 2017 membawakan tema 'Al-Arabiyyah : Bahasa dan Tamadun Umat Islam', manakala sub temanya pula adalah Pengajaran dan pembelajaran bahasa Arab di Asia Tenggara; Usaha dan perjuangan umat Islam dalam pengajaran bahasa Arab di Asia Tenggara; Institusi-institusi pengajaran bahasa Arab di Asia

Tenggara; Manahij / Modul pengajaran bahasa Arab di Asia Tenggara; dan Peluang-peluang pengembangan bahasa Arab dan pembelajarannya di Asia Tenggara.

Tujuan persidangan tersebut diadakan bagi merancang dan merangka masa depan pengajaran dan pembelajaran bahasa Arab di Asia Tenggara, di samping mengenal pasti sudut-sudut dan potensi yang perlu kepada pengembangannya.

**PENGARAH** Pusat Bahasa, Kolej Universiti Perguruan Ugama Seri Begawan, Dr. Awang Haji Hambali bin Haji Jaili, selaku Pengerusi Bersama Jawatankuasa Kerja Persidangan Antarabangsa Bahasa Arab di Asia Tenggara Tahun 2017 semasa menyampaikan ucapan alu-aluan.



**ANTARA** peserta Persidangan Antarabangsa Bahasa Arab di Asia Tenggara Tahun 2017.

## MAKLUMAN

### Waktu beroperasi Kaunter Perkhidmatan Pendaftaran Kad Pengenalan

**BANDAR SERI BEGAWAN**, Rabu, 1 Februari. - Jabatan Imigresen dan Pendaftaran Kebangsaan (JIPK) memaklumkan kepada orang ramai bahawa Kaunter Perkhidmatan Pendaftaran Kad Pengenalan di Ibu Pejabat, JIPK hanya akan beroperasi pada dua minggu pertama Jumaat setiap bulan sahaja bermula bulan Februari 2017.

Sementara itu, Perkhidmatan Pendaftaran Kad Pengenalan di Pejabat Pendaftaran Cawangan Pendaftaran Kuala Belait, Tutong dan Temburong akan ditiadakan pada setiap Jumaat bermula pada bulan Februari 2017.

Untuk sebarang maklumat lanjut, orang ramai boleh melayari portal JIPK di [www.immigration.gov.bn](http://www.immigration.gov.bn) atau hubungi pejabat melalui talian +673 2383107 semasa waktu bekerja.